

ՍՅՈՒՆԻՔԻ ՄԱՐԶՊԵՏ ՌՈԲԵՐՏ ՂՈՒԿԱՍՅԱՆԻ ՈՒՂԵՐՁԸ ԱՆԿԱԽՈՒԹՅԱՆ ՏՈՆԻ ԿԱՊԱԿՑՈՒԹՅԱՄԲ

21.09.2025



Սիրելի՛ հայրենակիցներ

Անկախությունը մեզ համար ոչ միայն պատմական փաստ է, այլև ամեն քաղաքացու ամենօրյա աշխատանքն ու պատասխանատվությունը:

Շնորհավորում եմ բոլորիս յուրաքանչյուր հայի համար կարևորագույն տոներից մեկի՝
Հայաստանի անկախության օրվա կապակցությամբ:

Երեսուկչորս տարի առաջ այս օրը վերականգնելով ու ամրապնդելով ազգային
ինքնության մեր խորհրդանիշը՝ հաստատեցինք նաև հավատարմությունը մեր
նախնիներին, որոնք երազում էին տեսնել հայրենիքը՝ որպես անկախ ու ազատ երկիր:
1991-ին վաստակեցինք սեփական պետությունը կառուցելու իրավունքը, բայց
անկախությունը ոչ միայն դարակազմիկ հաղթանակ է, այլև մեծ
պատասխանատվություն թե՛ անցյալի հանդեպ, թե՛ գալիք սերունդների առջև:

Ուստի այսօր՝ մեզ վստահված ներկայում, պարտավոր ենք ամրապնդել մեր
պետականությունը, զարգացնել այն կենսական բոլոր ոլորտներում և ստեղծել
պայմաններ արժանապատիվ կյանքի համար՝ ժառանգելով այդ ամենն արդեն հայ ազգի
ապագա զավակներին:

Հավատում եմ, որ միասին՝ համախմբվածությամբ, քրտնաջան աշխատանքով և վաղվա
հանդեպ հավատով, կհաղթահարենք բոլոր մարտահրավերներն ու կդարձնենք
Հայաստանն առավել ուժեղ, պաշտպանված, անվտանգ ու բարգավաճ՝ հզորացնելով
տնտեսությունը, պահպանելով մեր մշակույթն ու ավանդույթները:

Մեր երկրի ապագան կախված է յուրաքանչյուրիս նվիրվածությունից և Հայրենիքի
հանդեպ սիրուց:

Տոնական այս օրը մաղթում եմ բոլորիդ խաղաղություն, լավատեսություն,
բարեկեցություն, շարունակական հաջողություններ՝ ի շահ մեր ընտանիքների ու ի շահ
հայրենիքի:

Թո՛ղ Հայաստանի Հանրապետության անկախությունը միշտ լինի անսասան հենասյուն
մեզանից յուրաքանչյուրի համար, իսկ մենք զորավիգ լինենք նրան՝ ամեն օր այդ
հենասյունն ամրացնելու վճռականությամբ ու արարմունքով:

Շնորհավո՛ր Հայաստանի անկախության տոնը: